



TAUTAI A'E!

Ua faamalo le taupati. Ua faamalo le tauivi. Ua malo fai o le faiva. Tautai a'e! O le alaga o le fiafia ma le loto faafetai ua lagonaina i lenei vaitau. O le leo o le Ekalesia ua faamalieleina ona o se auauunaga a lana aufaigaluega ua iu manuia.

O le tausaga lenei ua atoa iai le tausaga faatapulaina mo Risatisone Ete ma le Faletua ia Fereni e mapu ane ai mai galuega sa punonou ai a le Ekalesia. Se'i fai sina malologa aua ua matua le soifua auauunaga ma le soifua ofoina mo le Atua ma lana galuega.

Ao le tausaga foi lenei ua atoa iai le fa sefulu ma le tolu tausaga o le auauunaga a le susuga ia Ete i le Atua e ala i lana Ekalesia. O se auauunaga galuegalue malosi ma le faamaoni. O le faailoga o lea itu pe a silasila i le tele o Komiti ma vaega eseese o le Ekalesia na ia tautua ai. Ao totonu o nei auauunaga sa faapea ona tele sona sao i le atinaega o le Kolisi Faafaifeau i Malua.

O le Toeaina o Ete sa avea ma faiaoga o le Kolisi mai le tausaga e 1966 seia oo i le 1974, o le tausaga lava lea na valaauina ai e le aulotu i Ueligitone Niu Sila e avea ma a latou faifeau. O lea lava o loo galulue ai e oo mai i le tausaga lenei ua penisione ai.

E penisione Risatisone Ete o loo ia umia le tofi o le Taitaifono o le Komiti a le Au Toeaina. O le Taitaifono lava lea o le Komiti Faatonu. A o ia foi o le Taitaifono o le Komiti o Malua. O le Komiti e fitoitonu ma le vaai ma le faataatitiaina o taiala mo galuega atiae aemaise le solosolo lelei o le Kolisi Faafaifeau. O le tasi lea o itu e lagonaina ai e le susuga i le Alii Pule ma le Kolisi le agaga faafetai i le susuga i le Toeaina ona o lona sao taua i le Kolisi. E le gata sa ia



**Susuga i le Toeaina Faatonu
Risatisone Ete ma le faletua ia Fereni**

faafaileleina nisi o le aufaigaluega o galulue ai nei i le Ekalesia ma aulotu ao lona sao tele ina o avea ma Taitaifono o le Komiti o Malua. Sa le finauina ma faamaiteina le tele o mea lelei aua lava le manuia o le Kolisi i ona itu uma. O se taitai lototele ma le faamaoni. E ese le nau nau ina ia avea Malua o se Kolisi e mapuna mai ai ni faifeau amio tausaaia ma le faapaiaina. Ao se taitai foi e unaia le Kolisi ina ia alualu i luma i le itu tau le atamai ma le aoaoina. E ese le malosi o

lana lagolago i mataupu e tuuina atu e le Kolisi mo le atinaega o le Kolisi aemaise i lana aufaigaluega galulue. O taimi uma foi e maua ai se mafutaga a le Toeaina ma le Kolisi e le mapu lona faamalosia ma le faalaeiau i Aoa ma Faletua, faapea ai foi i lana aufaigaluega galulue ina ia aua lava le faalogologotiga i le ola aoaoina ma le ola aoa atu. Ae le gata i lea, o lona sao i le faafaileleina o sui mai lana aulotu, lea ua faamanuiaina ai lana Kolisi Faafaifeau i le toatele o ana tamafanau ua mafai ona galulue faafaiaoga. O ia sao taua o le Toeaina na naunau ai lava le Alii Pule ma le Kolisi mo se avanoa sei mafuta ai ma le Kolisi. Se avanoa e tali atu ai le Kolisi ma le agaga faafetai ona o nei sao taua, e le gata i le itu i fao o le Kolisi aemaise lava i le ola faaleagaga. Lea na faataunuuna ai le mafutaga fiafia ma ana auauunaga i le Aso Sa, 15 Mati, 2009.

Ae le faaititia foi le sao taua o le Faletua ia Fereni e le gata lava mo faletua o lenei Kolisi ae faapea foi i le fanau iti. Aua foi o ia o se tina na unaia ma faatinoina le aoaoina o fanau iti e ala i le aoga amata i Malua. Lea lava na ia faaauuina lea taleni ina ua galulue ai i le aulotu i Ueligitone. O aso uma foi e mafuta ai ma le Kolisi e ala i sauniga, e ese le fiafia o fanau a le Kolisi i ana tala malie ae maua ai le tele o aoaoga lelei mo latou.

E manatua pea nei auauunaga lelei ma le aoga e le Kolisi. Ua faaagaina ai e le Alii Pule ma le Kolisi lenei lomiga o lana Maluapapa, e faapitoa mo nei auauunaga aoga a le Atua ua tele so la sao mo lana Ekalesia ae faapea ai lana Kolisi Faafaifeau. Ia manuia tele le malologa!

SILASILA I TOTONU

Talofa Lava! - Polofesa Otele Perelini / Amatalia Galuega	2	Ia Motu le Pa a Ua Iloa	10
AOGA TUSI PAIA MALUA: Uluai Faauuga 2009	3	Faiaoga Fou mo le Kolisi / Faalauteleina o le Faletusi	11
Faaulufaleina o le Maota: MALUA MISSION HOUSE	4, 5	Faataua le Soifua Maloloina / Maota Fou Pulega Sini i Matu	12,13
Fale Koleni (Gymnasium)	5	Mafutaga Aoa / Pa Povi	13
Tagapolo Faava-o-malo	6,7	Mafutaga a Faletua / Malua Kindy	14
Eperone ma Salataima Futi mo East Tamaki / Tausaga 1	8	Autalavou Laiti / Taaloga Aoa	15,16
Mafutaga Malua ma Piula	9	Aoga Aso Sa (Kuata Muamua)	16

TALOFA LAVA!

E muamua ona faatalofa atu i le mamalu o le Fono Tele a le Ekalesia o loo ua tauaofia i Malua nei. I lau Susuga i le Taitaifono ma le paia o la outou Laulau, o le Komiti a le Au Toeaina faapea Komiti eseese, o le mamalu i le au usu fono mai matagaluega eseese, aemaise ai le Mafutaga a Tina o le Ekalesia, faapea le loaloa o le Ekalesia ua potopoto mai e molimauina fonotaga a le Ekalesia i lenei tausaga 2009. E viia pea le alofa ma le agalelei o lo tatou Atua ona ua ia taitaiina mai le paia o le Ekalesia e aulia mai ai nai aso faaiu o ana fonotaga i lenei tausaga.

E lagona le loto faafetai tele i le Ekalesia aemaise ai le Komiti o Malua ma le Komiti a le Au Toeaina o loo vaaia le Kolisi Faafaifeau, ona o loo le aunoa pea ona molimauina le lagolagoina malosi o le Kolisi i ana galuega ma polokalame faagasolo o lenei tausaga. Tau ina ia viia pea le Atua e tusa ma le tautua a le Ekalesia i soo se auala e faatinoina ai fuafuaga uma mo le manuia o lana Kolisi Faafaifeau.

Avea foi lenei avanoa e momoli atu ai le faafetai tele i le Susuga ia Risatisone Ete ma le faletua ia Fereni e tusa ma lo oulua soifua auauna i le Ekalesia faapea ai ma le



Polofesa Otele Perelini
Pule o le Kolisi

Kolisi i Malua. O la oulua tautua i le Kolisi i tausaga e tele, amata mai i taimi na uluai avea ai ma faiaoga o lenei Kolisi seia oo ina faaiuina i le avea ma Taitaifono o le Komiti o Malua, e lagona ai le loto faafetai i le Atua. Tau ina ia viia pea le Atua e tusa ma lo oulua soifua auauna i tausaga e tele na tautuaina ai lana Ekalesia ma le Talalelei. Tau ina ia manuia lo oulua mapu ane mo sina malologa faapea le tapuaia ma le fautuaina o lana Ekalesia i ona faiva.

E le faaititia le agaga faafetai tele i le Sosaiete a Malua Tuai e

tusa ai ma le galuega tele o maota e ono mo le Kolisi ma le Ekalesia ua maea ona fausia. Lau Susuga i le Peresetene, Apelu Lelevaga FT, faafetai, Lau Susuga i le Teutupe, Siolo Tauati FT, faafetai, Lau Susuga i le Failautusi Iupeli Ieremia FS ma le mamalu o le Komiti Galue a le SMT, o Tama o le Ekalesia faapea Susuga i Faafeagaiga, faamalo le alofa i le Kolisi Faafaifeau i Malua. Ua tele au galuega e faaalua ai lau tautua mo le manuia o alo ma fanau o le Ekalesia o loo le aunoa ona aotauina i lau Kolisi Faafaifeau.

O nei maota, e le gata ina faaaogaina e le Kolisi mo aoao e lei faaipoipoina, ae ou te talitonu, o le a mafai foi ona faaaogaina e le Ekalesia i soo se auala e faatinoina ai lana auaunaga faamisionare e le gata i fonotaga ma polokalame mo Samoa nei, ae faapea foi i le Pasefika ma le lalolagi atoa. Le Mafutaga a Tina, o lou maota foi lenei e faaluaina ai Papauta mo au fuafuaga mo le lumanai.

Tau ina ia viia pea le Atua ona o Lana Kolisi Faafaifeau i Malua.

AMATALIA GALUEGA A LE KOLISI

O galuega a le Kolisi i Malua i tausaga taitasi e tatalaina lava i lana tapuaiga masani faapea ai ma le Faamanatuga. O nei tapuaiga e taitaia e Toeaina o le Komiti o Malua. O lenei la tausaga e le ese mai lava i tausaga ua mavae. E le gata la e talosia ai galuega a le Kolisi i lenei tausaga ae faapea foi ona faaulufaleina ma talia aloaia ai sui fou o le auaigaluega faiaoga a le Kolisi. O le taitai o le sauniga o le Toeaina Faatonu ia Tunumoso Iosia. O Tavita Roma na momoliina talosaga ao Tautiaga Senara na faitauina le Tusi Paia. O le faalaeiau a le taitai na faavae i le Tusi o Neemia 3:1-14 mai le Feagaiga Tuai ma le Kalatia 6:1-5 o le Feagaiga Fou. O le manatu autu o le feau faamalosi 'O le a se mea o le a manatuaina ai oe?'

O susuga i faiaoga fou ia Alesana Pala'amo ma le faletua ia Lemau, Aigofie Marino ma le Faletua o Ella, ma le susuga ia Visio Saga na talia aloaia e avea ma faiaoga o le Kolisi.

Ina ua maea le sauniga ona faapea ai lea ona faaauau i le Fale Mafutaga i se taumafataga na saunia e le Kolisi. Sa faaalua ai foi le agaga fiafia o le auuso na talia aloaia e ala i la latou upu faafetai ma nai meaalofo na tauaaina mo Toeaina na auai faapea ai ma le Alii Pule ma le Kolisi i Malua. Na faaiuina i le tatolo ma faapea ai loa ona faamavae ma faatofa i lea po.

AOGA TUSI PAIA MALUA: ULUAI FAAUUGA 2009



O le Uluai Vasega Faaui 2009

Tumua pea le viiga o le Atua ona o lona aao taitai malaga ua taunuu manuia mai ai foi le folauga a le Ekalesia i lona Fonotele i lenei tausaga. Talitonu lava le faamoemoe, o lo o manuia gasologa o le Fonotele i le afio o le Afioga i le Taitaifono ma le Laulau o le Fonotele aemaise o le mamalu o Komiti eseese o le Ekalesia ma le mamalu o usufono mai Matagaluega eseese o le Ekalesia.

O le tausaga foi lenei, o se tasi lea o tausaga taua i le tala faasolopito o le Ekalesia i ana aoaoga faale-faatuatua. O Mati 14, 2009 na faataunuaina ai le Faauiuga muamua o le Aoga Tusi Paia. O lea faauuga na tauaaina ai le tusi pasi o le Certificate in Theological Studies ia i latou e toa 33. O se aso ese lea aso, e moni ai lava le poto, 'o le manao ua taunuu, o le laau o le soifua lea'. O se miti sa lafo i le Atua lona faataunuaina, o lea ua tali aua ua tini lona uluai matalalaga. Tatou faafoi pea le viiga i le Atua i lona tali mai pea i le tatalo a lona Ekalesia atia'e.

O lenei sauniga faapitoa o le faauuga na taitaiina lava e Tama o le Ekalesia, o sui foi o le Komiti o Malua. O le taitaifono, Risetisone Été na taitaiina le sauniga. O tatalo na saunia e Tautiaga Senara o le Failautusi o le Komiti a le Au Toeaina. Na saunoa foi le Alii Pule e tusa ai ma le ripoti o lenei aoga. O le tofa a Manu Aoete o ia lea o le sui o le au faauu na molimoliina la latou faafetai i lenei avanoa taua ua aoaina ma faalateleina ai lo latou iloa i le Tusi Paia ma le Mataupu Silisili. Na faapea ona faauau lenei fiafia faapitoa i le taumafataga ma siva i le malae o Malua. O le susuga lava ia Eperone Futi, o

le taitai o le Komiti o le Aoga Tusi Paia na fai ma fofoga o le aso. Na faaiuina manuia lenei fiafia i le tatalo ma le faamanuia na saunia lava e le taitai o le sauniga.

O lenei faauuga na atili matagofie ona o le toatele o e na faauina o nisi iloga o le malo, atunuu ma le ekalesia. Sa faapea foi ona maua luga ona o le faauina ai o le Sui o le Fono a Sui Tofia, Le Tama a Aiga, Tuimalealiifano Sualauvi II ma lona Masiofo ia Faamausili Leinafo.

Tatou tatalo foi ia faaogaina pea i latou o lo o utuvai i lenei vaipuna i soo se nuu ma aulotu o lo o tautua ai i latou nei. O le lisi la lenei o i latou sa faamanuiaina i lea faauuga:

Amata Mulitalo, Apoua Faumuina Manu Samuelu, Asofiafina Peneueta, Epenesa Toleafoa, Faamausili Leinafo T Sualauvi II, Faumuia Manu Samuelu, Fofoga Setefano, Lapu'aisalele Tagaloa, Lealiifano Dr Iopu Tanielu, Liufau Leau Vaiaso, Manu Aoete, Milly Pita, Momoi Tavita, Mose Aofia, Namulauulu Tavita, Naomi Misa, Nuulopa S Liu, Paiaaua lona, Pauline Upu, Samoa Pita, Sarena Tiitii, Tagaloa Suafai Faitua, Talalelei Niue, Tausalaatoa Talapusi, Taveuveu Fiti, Telelealofoa Sio, Theresa Tapaleao, Tiulama Maugatai, Tracy Gatoloai, Tuimalealiifano V Sualauvi II, Vaipou Nofoaiga, Vaisaili Palale.

Ae o se avanoa taua foi lenei e faailoa ai foi i le mamalu o le Ekalesia sina tala puupuu o galuega a le Aoga Tusi Paia a le Ekalesia. E muai faaleo le faafetai a le Kolisi i le Ekalesia ona o tatalo ua manuia ai le faatinoina o tiute masani a le Aoga Tusi Paia e pei ona feagai

ma le Kolisi. O lo o faagasolo pea galuega a le Aoga Tusi Paia e pei ona masani ai i vaituuaga masani. Mo lenei vaituuaga, o lea ua feagai nei ma mlologa ma sauni mai ai i le amataga o le kuata fou i ana suega mo lenei vaituuaga. E 14 mataupu o lo o aoaina i lenei vaituuaga, ma o lo o aoaina nei mataupu e le Susuga i le Pule o le Kolisi faatasi ai ma faiaoga e pei ona masani ai.

Ua matauina pea le faatupulaia o le Aoga Tusi Paia. Mo lenei tausaga, ua faaopoopo mai faletua e toa iva o le tausaga muamua, o faletua fou o aoao e toalua sa faaipoipo i le tuuga o le Kerisimasi na mavae atu nei, faatasi ai ma le faletua o le faifeau Kiripati o lo o aoaina i le Kolisi. Ua faaopoopoina foi tagata tausavali, ma o se faailoga lea o le agai ina faatuputeleina o lenei foi faamoemoe o le Ekalesia.

E faauau pea lenei faamoemoe taua o le Ekalesia e pei ona faamaite e Tama o le Ekalesia ona o le agaga lava ina ia faalauaitele le silafia o ona tagata lotu i mataupu tau le Atua. O le ala lea e moomia ai pea le tapuaiga ma tatalo a le Ekalesia ina ia manuia lenei faamoemoe mo le viiga o le Silisili Ese.

E tatalo foi le Kolisi mo le manuia o le Fonotele o lenei tausaga. Afai foi ae faaiuina le tauaafiaga o le Fonotele, ia tulimuliauloina e le Agaga o le Atua faatasi ai ma ana faamanuiaga le paia o le Ekalesia pe a taliu le uto i fanua, i afioaga ma aulotu. Tatalo ia taape a fatuati, talosia le toe tauaafia o le Fonotele i le tausaga fou pe a aulia i le alofa o le Atua. Ia manuia foi tiute o toote o lenei tausaga. Manuia foi le Aoga Tusi Paia i le alofa o le Atua.

FAAULUFALEINA LE MAOTA: MALUA MISSION HOUSE



O i latou uma lava na aotauina i le Kolisi Faafaifeau i Malua o sui ia o le sosaiete ua taua o le Sosaiete o Malua Tuai (SMT). O le faamoemoe laualuga lava o le SMT o le fesoasoani lea i ni auala e faaleleia atili ai ni mea o moomia e le Kolisi Faafaifeau.

O le Aso Faraile, 15 Me, 2009 na umusaina ai se tasi o galuega tele i totonu o le Tafatolu i Malua na feagai ma le SMT. O le tino mai o se miti poo se molimanao a le Kolisi ua fai si leva ona tuuina atu i le SMT.

O le uluai faamoemoe na talosagaina ai lenei maota ina ia mafai ona faaogaina e nonofo ai aoao e lei faia ni o latou aiga. O le tulaga o fale mo aoao singles ua fai si laiti pe a faatusatusa i le aofai o aoao ua iai nei. Aua foi ua le gata ina tuuina i lalo nisi o fale sa faaogaina ona o le faaavanoaina o le fanua mo le Fale Fono, ao nisi ua toe fausiaina ina ia mafai ona nonofo ai Faiaoga ma o latou aiga.

Ae peitai, ua lautele atu le faamoemoe o le maota fou lenei nai lo le uluai faamoemoe sa iai. Ua le na o se maota e nofoia e aoao singles ae ua faia mo le faamoemoe ina ia faaogaina mo le galuega talai poo le galuega faamisionare a le Ekalesia. A ua faia lea tulaga ona o se fesoasoani tele tau seleni na

foaiina mai e le Faalapopotoga o Galuega Faamisionare a le Lalolagi (FGFL) poo le Council for World Mission (CWM) mo lenei galuega. Ma lo latou talitonuga o lenei maota e faaogaina mo le galuega faamisionare a le EFKS. O le mafuaaga lea ua faaigoaina ai lenei maota tele, o le **MALUA MISSION HOUSE**.



**Toese Toailoa, Apelu Lelevaga
(Peresetene SMT), Tavita Roma,
Otele Perelini**

O lenei galuega tele e ono ona fale taitasi eseese o iai. E ogatonu i le fale faataliolio mo suesuega ma faitauga tusi, ae siomia e iunite poo poloka e lima. O nei iunite poo poloka, e iva potu moe mo tagata taitoalua (doubles), fale taele ma fale-le-taua e tailua e iai. O lona uiga e tusa ma le toluse-

fulu ono potu moe (doubles) o iai. O le iunite lona lima o le faleai ma le umukuka lea. Ua maea foi ona fausia le vaivevela e faaogaina ai ia solar panels poo masini e faaogaina ai le malosia o le la. O totoga uma o fale taele ma fale-le-taua o mea lava anagata ma le lelei. O le isi tulaga ese o lenei fale o le fola o loo valiina ai. Ua le o ni kapeta poo ni maa fola fale (tiles) e pei ona masani ai, ao se ituaiga o vali e tai foliga lava i ni maa (tiles) ae maeu foi lona tino mai. E le gata e iila ae le talatala.

Na amataina lenei galuega i le faaiuga o le masina o Novema, 2008 ae na umusaina i le Aso 15 Me, 2005. O le susuga i le Peresetene o le SMT, Apelu Lelevaga (FT) na ofoina aloaia lenei galuega tele mo le Kolisi i Malua. O le susuga i le taitaifono o le Komiti (Board) a Malua, o le taitaifono foi lea o le Komiti a le Au Toeaina, Risatisone Ete (FT) na taliaina aloaia lenei foai e fai ma sui o le Kolisi ma le Ekalesia Aoao. O le ootiina o le lipine na faatinoina e Ferani Ete, le faletua o le susuga ia Risatisone Ete. Ina ua maea le ootiina o le lipine ona ulufale aloaia lea o Tama o le Ekalesia ma faletua, o valaaulia ma le toatele o le afaigaluega mo le sauniga lotu e faapaia ai lenei galuega. O le susuga lava ia Risatisone sa taitaiina lenei sauniga. O le

fa'aauau itulau 5

mai itulau 4

upu faalaeiau na maua mai i le Teuteronomi 7: 26 ma le Luka 19. O le faamalosi ma le feau ina ia faaoga tatau nei maota. Ia aua nei faaogaina i ni tu ma aga inosia. A ia fai ma fale e fia mafuta ma afio ai Iesu. Ae a nofo Iesu i le fale, na o le pau lea o le mafuaaga e mafai ai ona tafiese mea inosia uma. E le gata i lea, ia avea lenei maota e fai ma fale e maua ai le faaolataga. E pei ona maua ai le faaolataga o Sakaio i totonu o lona fale aua ua nofo ai Iesu. O le afio ai la o Iesu i le fale faapea loto o e ua iai, e tafiese ai uiga leaga e pei o le pepelo, gaioi, le faamaoni, ma isi lava uiga mataga. O se faalaeiau ua matua talafeagai e luina ai le autau faaolioli a Keriso o e o le a nofoia lenei maota.

Na faapea foi ona tuuina le avanoa i le Peresetene o le SMT mo sana saunoaga. O le aotelega lava o le saunoaga a le toeaina ia Apelu Lelevaga, o le faaleoina o lana faafetai e le gata mo le ekalesia ua potopoto ae faapitoa mo e na iloga la latou fesoasoani i lenei galuega tele. 1. Laulau a le Fonotele 2. Tama o le Ekalesia ma Faletua 3. Afioga i Alii Tiakono Toeaina ma Tiakono 4. Pule o le Kolisi i Malua

ma le Kolisi 5. Matua o Faiva ma le Aiga Salemalama 6. Ekalesia Aoao (mo le Tapuaiga) 7. Taitaifono ma le Komiti Tupe 8. Sui uma o le SMT 9. Komiti faafoe a le SMT.

O le tala o le galuega na folaina e le Toeaina ia Siolo Tauati (FT). O le konekarate fai fale a le susuga ia Misa Tauilili na manumalo i le tauofoga sa fai ma tuuina ai loa lenei galuega. O le tau aofai o le galuega e \$1,349,568.60. O le nei tau na faatupeina e saofaga a le SMT, meaalofo mai le FGFL, meaalofo na tuuina faaaitalafu mai le Ekalesia Aoao, Toomaga, faapea le fesoasoani a le Kolisi i Malua. O isi itu o le galuega na mafai ona maua ona o le aitalafu na mafai ona faatagaina mai i Kamupani nei: ACP, Samau Ent. (Evaeva), Bluebird Transport, SMI ma le AST. E maea la le galuega o loo iai le aitalafu e tusa ma le \$456,568.60. O loo iai lava le faamoemoe maua o le Komiti Faafoe a le SMT e mafai lava ona maua lenei tino i tupe e faamama ai le aitalafu e ala i ana tusi talosaga ua tuuina atu i nisi o itutino o le Ekalesia faapea saofaga o loo aoina mai i sui o le SMT o loo totoo pea.

Na maua foi le avanoa mo le Pule o le Kolisi, Prof. Otele Perelini.

Na ia momoli le agaga faafetai tele i le Paia o le Ekalesia Aoao i ona veaga uma. Mai lava i le Laulau a le Fonotele, Tama o le Ekalesia, Faifeau ma le Ekalesia Aoao, faapea i latou uma na fesoasoani i lenei galuega. Na faamamafaina e le Pule o le Kolisi, o lenei maota, o le maota o le Ekalesia uma, o le maota o tatou uma ma tagata uma. Na ia faailoa atili foi o le seleni na fesoasoani ai le Kolisi mo le galuega, o nai seleni lava na tau faamaopopo ma faapolopolo mai lava i le 1995 sei oo mai i lenei tausaga.

Ina ua maea le sauniga lotu ona faaaauai ai lea o lenei fiafia i se taumafataga mama ma faaaloaloga masani na saunia ma faatinoina e le Komiti ma le SMT. O le susuga ia lupeli Ieremia na fai ma fofoga o le SMT e molimolia ia faaaloaloga.

Fetalai Iesu, "A uma ona tatou faia o se mea, ona tatou faapea ane lea, o i tatou lava o auauna le aoga"

Ae pese le Faisalamo ma faapea ane, "Aua nei ia tei matou, le Alii e, aua nei ia tei matou, a ia tuuina atu le viiga i lou suafa, ona o lou alofa ma lou faamaoni."



O se vaaiga i Aoao ma Faletua o le Kolisi i Malua i le taimi o le umusaga

FALE KOLENI (Gymnasium)



Ona o le taumafaiga lava ina ia tausii pea le soifua maloloina lelei i le tino ma le mafaufau, o lea na a'e ai se finagalo i le susuga i le Alii Pule o le Kolisi ma le aiga faiaoga, ina ia fausia se fale koleni (Gym), e faaogaina e le Kolisi mo le

faamalositino. O lea faamoemoe ua faapoopo ai i le itu tau taaloga e pei ona iai le soka ma le lakapi i lumafale, malae tenisi ma le malae kirikiti, ina ia mafai lava ona tele le filifiliga a le tagata lava ia, i nofoaga e fiafia e taalo ma faamalositino ai. E \$50,000 le tau faatatau o lea galuega, e aofia ai ma le faatotogaina i masini ma meataalo faaneionapo. Ua maea nei ona fausia le fale, ae o loo talia nei ia masini ma meataalo sa faatauina mai Amerika. O se fale e fesoasoani tele i le Kolisi ina ia maua ai le faamalositino ma tausii ai le soifua maloloina lelei. O le faatinoga o



le galuega sa feagai lava ma aoao ua iai le tomali faakamuta, i lalo o le taitaiga a Susuga i faiaoga ia Maafala Lima ma Arthur Wulf.

TAGAPOLO FAAVA-O-MALO



Tauaaoina o le ASIENA - Toese Toailoa (Kapeteni Ausetalia) ia Otele Perelini (Kapeteni Malua) Siamupini 2009



Tauaaoina o le ipu - Popo Su'a (Kapeteni Niu Sila i Saute) ia Otele Perelini (Kapeteni Malua) Siamupini 2009

VENI VIDI VICI
(I CAME, I SAW, I CONQUERED)
(UA OU SAU, UA OU VAAI, UA OU
FAATOILALOINA)

O se tasi lenei o fuaitau lauiloa na tusia e Julius Caesar ina ua ia faa-toilaloina se tasi o aai tele i le Malo o Constantinople. Ae peitai ua le sa'o lenei fuaitau i au masii mai Ausetalia ma Niu Sila, o laumua o le Wallabies ma le All Blacks. O loo fetau lelei upu muamua e lua, Ua omai, Ua vaai, ae paga lea, ua le mafai ona latou faa-toilaloina.

Sa tele tala na faalele aemaise o manatunatuga ma mafaufauga agai i taaloga ao lei faatinoina. Sa faaauu lava finagalo o sui taitasi ia i le malos i a latou lava au. Ae pei ona sa'o ai le muagagana masani, "faatoa iloa lava le auro moni i le afi."

Malua vs Ausetalia

O le Aso Faraile 08 Aperila, 2009 na tusia ai se tasi o matatia i le tala-faasolopito o taaloga tagapolo faava-o-malo a le Kolisi i Malua. O le taimi muamua lea ua mafai ai ona feiloai ma fetau ma le aumasii mai i Ausetalia. Ua leva ona aumai le lu'i a le Wallabies ae sa faatua-tuai pea se finagalo o le kapeteni ia Otele Perelini ma le autaal o Malua. Aua sa mata'i pea pe o se lu'i faamaoni poo se galu na ona faafua ae le fati. Lenei la ua

faataunuuna ma ua manino ai loa i le au a le Wallabies, masalo lava e sa'o le faatua-tuai o se finagalo o le au a Malua.

O lenei taaloga na faia i le malaetapolo o le Penina i Faleolo. O le au a Ausetalia na taitaia mai e susuga i Toeaina ia Peleti Toailoa ma Simeona Taefu. O isi sui o lea au o faifeau mai Matagaluega a Melepone, Kuiniselani ma Niusauelese. Na faapea foi ona auai nisi o uso a faigaluega mai isi ekalesia i Ausetalia lava sa fesoasoani i le taumafaiga a lenei lava au.

Ina ua maea le malu taeao ona faagasolo ai loa lea o le faagatama. Sa muai faataatia lava tulafono ma aiaiga uma o le taaloga e sui o le Komiti (Eperone ma Arthur mai Malua ao Kolia mai Ausetalia). E valu au aloaia a Ausetalia ae fitu mai Malua. O le faailoga o le ipu e faitauina ai na o sikoa lelei e fitu mai au aloaia a itu pele taitoatasi. E tai toalua au na o faatasi ina ia faigofie ai ma vave le gasologa o le taamilosaga vagana ai le vaega muamua na toatolu. O faasologa la nei o paga na taaalo ma a latou sikoa na maua:

Ausetalia	Malua
Peleti/Su'a 82,	Otele/Featunai 85,
Siaosi/Aloese 93;	
Simeona/Asi 85,	Esekia/Letaulau
83;	
Uikilifi/Saifoloi 91,	Peniamina/Fetu
87;	
Kolia/loelu 79,	Maafala/Sam 86;
Tanielu/Fiti 92,	Eperone/Arthur 79;
Apineru/Isaako 79,	Makesi/Alesana
84;	
Harry/Tapenaga 98,	Saipele/Vaitusi
83.	

O le tuufaatasiga o sikoa lelei e fitu na maua ai e le au mai Ausetalia le 601 ao le au a Malua e 587. O le faaiuga la o lenei uluai taaloga faava-o-malo ua manumalo ai le au mai Malua i le siamupini.

Ao lei tauaaoina le ipu o le siamupini na faapea ona muamua ona faamatalatala mai e le Komiti mai Ausetalia le igoa ma le uiga o lenei ipu na latou saunia. O le igoa o le ipu o le ASIENA. O lona faamataupu silisiliina e faapea: A - Autau (galulue ma e o faaolioli), S - Sauniuni, I - Iesu, E - Ekalesia, N - Nuu Uma, A - Atulaulau. O sona

mai itulau 6

faamatalaga atoa e faapea: O le Autau Sauniuni a Iesu mo lana Ekalesia i Nuu uma ma le Atulaulau.

Na faaii i le laugatogi ma le faamalositino, o le taumafataga na saunia e le au a Malua.

O faailoga faapitoa, Best Gross – Kolio/loelu, Apineru/Isaako, Eperone/Arthur. Longest Drive – Su'a Stan. O le nearest to the pin – Arthur. Ae na tofusua uma lava sui auai ma nai meaalofo na saunia e le autalo mai Malua. Sa faapea foi ona tauaaina mai e Ausetalia meaalofo mo le au a Malua e aofia ai pusa polo ma le seleni.

Na faaiuina saunoaga o lea aso e le Toeaina ia Peleti Toailoa e fai ma sui o le au sii mai. Na ia faamamafaina ai, e le o le manumalo ao le mafutaga ma le faamalositino. E leai la se mea e ao ai ona tiga se finagalo o se isi ae ia fiafia uma ina ia viia ai le Atua. Ae na faaii lava lana saunoaga e faapea o lea na ona tuu iinei ia Malua le ipu na te vaaia. Na talifuaitau foi le susuga i le Alii Pule o le Kolisi ia Otele Perelini o le kapeteni foi o le au a Malua. Na faafetaia le au a Ausetalia i ona vaega uma ae muliai i le saunoaga e faapea, 'Ua lelei o le a faapea ona vaai e le au a Malua lenei ipu e le gata o le tausaga nei, ae faapea i le tausaga fou, ma tua atu, ma faaauau ai lava lana vaaiga o lenei ipu.' E pei foi ona iai nisi o ipu o loo faaauau pea le vaaia e Malua mai lea tausaga i lea tausaga. O le aotelega lava o le aso o le fiafia ma le mafuta e ala i lenei foi faagatama. Ua maea foi la ona faatulagaina i le tausaga fou le Aso Faraile ao lumanai Fonotaga a le Ekalesia e toe taaalo ai mo lenei ipu. Na faaiuina i le tatalo na saunia e le Toeaina Faatonu ia Peleti ma faapea ai loa ona lulu aao ma faatofa.

E fia faamauina foi le faafetai faapitoa i le lagolago malosia a le Samoa Tel Go Mobile e ala i faleie ma pulou o le toniga a le au taalo a Malua.

Malua vs Niu Sila i Saute

O le taaloga lava ia i le va o nei au e lua ua fai si leva. Ua matua masani foi le taalo a le isi au i le isi au. Pau si suiga na vaaia i lenei tausaga ua

iai sui fou o le au lenei a le Crusaders. Ae ui ina fou ao sui ua leva ona faia lenei taaloga.

E leai lava se eseese o lenei foi tausaga ma tausaga ua mavae aua ua vaaia le saunia lelei o au e lua. Aemaise lava i le tapenaga a Niu Sila i Saute ona ua tolu tausaga sosoo o umia pea e le au a Malua le ipu o le siamupini. E ese foi le



Popo Su'a, Otele Perelini, Tumama Vili

matagofie o toniga a au e lua. Ma o le laei a le au a Niu Sila o lanu lava a le Crusaders o le mumu ma le uliuli, ia ao Malua o lana lanu papae lava o le faailoga o le tausaaia. Na faataunuuna lenei faamoemoe i le malae tapolo i Fagalii, Aso Lulu 13 Me, 2009. Na muamua lava i le tatalo na saunia e le Toeaina o Popo Su'a. O le gasologa o le taamilosaga i ona itu uma na feagai lava ma Komiti a au e lua (Meki/Time o Niu Sila, Eperone/Arthur o Malua).

O le ta o le itula e 2:30 i le aoauli na maea uma ai le taamilosaga. Ia e ese lenei tausaga i le mata fiafia uma o le au taaalo. Na faaauau le mafutaga i le taumafataga i le fale kalapu tapolo i Fagalii lava ma faia ai ma le laugatogi. E tele ma felanulanuai faailoga aemaise o

faailoga faapitoa na tufatufaina. O le nearest to the pin e lua pine na faia ai o le pine 6 ma le pine 13. O le pine 6 na mauaina e Otele (Malua) ao le pine 13 o Sam (Malua). O le longest drive na vaevaeina i vaega e lua. Oi latou e fai sina masasau o ta ma i latou e le matua malosia tele. O le vaega la o le A flight na mauaina lea e Sam (Malua) ao le B flight na mauaina e Sesera (Malua). Na tofufusia uma au ma nai faailoga na maua.

O le iuga o taaloga a au na auai: **Crusaders Malua**
Popo/Tumama 74, Otele/Featunai 72;
Senetenari/Time 78, Maafala/Sam 74;
Nove/Pelenato 78, Esekia/Sesera 74;
Meki/Faafetai 79, Saipela/Vaitusi 83;
Seu/Nevin 86, Peniamina/Fetu 82
Periti/Perkins 79, Eperone/Arthur 74;
Menu/Mu'a 89, Makesi/Alesana 78.

O le tuufaatasiga na manumalo ai le au a Malua ma faapea ai foi ona toe tumau le ipu. Ma o le fa ai nei o tausaga sosoo o siamupini pea Malua. E ui ina manumalo Malua ae ua vaaia le tele o le alualu i luma o le finau a le Crusaders. Ae paga lea, o le agai i luma o le Crusaders ua faapea foi ona soasoa atili ai le alualu i luma o le au a Malua. E pei ona saunoa le kapeteni o le au a Niu Sila, e lei sau tamala lava la latou au. Ae peitai ua le mafai lava le malosia o le pui-pui a Malua. Na talifuaitau foi le kapeteni a Malua e faafetaia ai le au a Niu Sila e le gata mo le taaloga ao le saunia lelei o itu uma o le taamilosaga. O le agaga maua lava, ia avea nei faagatama e fealofani ai le au faigaluega a le Atua. O le tatalo a kapeteni a au e lua, ia faatumauiina pea lenei taamilosaga i tausaga uma i le va o Niu Sila i Saute ma le Kolisi Faafaifeau i Malua. Na momoli le faafetai faapitoa i le komiti faafoe ma faaiuina ai i le tatalo na saunia e Nove o le sui o le komiti. Na maea lenei aso fiafia ina ua lulu aao ma faatofa.

Ae mo le au a Malua, ua mafai ona tatou faapea ane, VENI, VIDI, VICI.



O le Au Taalo a Ausetalia ma Malua

EPERONE MA SALATAIMA FUTI MO LE EKALLESIA EAST TAMAKI, AUKILANI, NIU SILA

O le fonotaga a le Komiti o Malua ia Ianuari, 2009 na faamaonia ai le faamatuina atu o le Susuga i le faiaoga ia Eperone Futi ma le Faletua ia Salataima mo le galuega faafaifeau tausinu. Ua valaauina le susuga i le faiaoga ma le faletua e le Ekalesia i East Tamaki, Aukilani Niu Sila. O le Ekalesia sa tausia e le susuga ia Peni Vai (ua malui) ma le faletua o Rosa. O le susuga ia Eperone o se tasi o faiaoga sinia a le Kolisi Faafaifeau. Ua silia ma le sefulu tausaga o galue ai i lenei tofiga. Na faaiuina lona taumafai i Malua i le tausaga 1994 ma faamanuiaina ai i se sikolosipi a le Ekalesia mo le Aoga Faafaifeau i Fiti (PTC). Na faauuina lona BD (Hons) i le Feagaiga Tuai i le faaiuga o le 1997. Na tofiaina ai loa e le Komiti o Malua e avea ma faiaoga i le amataga o le 1998. O le tausaga e 2002 na faaauau ai le faalateleina o le susuga ia Futi i le aoga a Princeton Seminary i Amerika. Na faauuina mai ai lona Masters in Theology ma faapea ona toe faaauau ai le auaunaga i le Kolisi i le tausaga e 2003. E talia nei la le faamatuina atu o le susuga ia Futi o avea ma faiaoga sinia i le vaega o le Feagaiga Tuai.

O Eperone ma Salataima o ni auauna aoga ma le faatuatua i soo se itu o le galuega i Malua nei. O ia foi o loo avea ma taitai o le Komiti o loo feagai ma le Aoga Tusi Paia a Malua.

E le gata la i le tiute faafaiaoga, ao isi itu uma o le atinaega o le Kolisi i Malua. E oo foi i le itu tau taaloga. O Futi o le sui kape-teni o le au tapolo faava-o-malo a le Kolisi ma o ia foi o le komiti tumau o lea lava faagatama.

E ese foi le uiga malie o lenei uso a faigaluega. E faitalamalie ma fiafia i suaga ma isi uso a faigaluega. E fiafia e ofoina lana



Futi Family - Salataima, Toma, Tumanu, Eperone

fesoasoani aemaise lona silafia faale-Tusi Paia e le gata mo susuga i aoao ae faapea ai mo le aufaigaluega galulue o loo gasolosolo mai i le Kolisi.

E faapea foi i le Faletua ia Salataima. Ua silafia uma e faletua o faiaoga ma faletua o aoao le tele o lona sao. Aemaise o le faasoaina o ana taleni mo le agai i luma o e gasolo mai i le Kolisi. O ia o se faiaoga Aso Sa faatua-tuaina faapea ai i le itu tau taaloga. E talenia i taaloga aemaise lava i galuega taulima. E tausafia ma agamalie. E manatu foi o le a misia e nai o la alo, Tumanu ma Toma lenei aai sa fai ma o la nuu ma aiga i nei tausaga e tele ao aumau ai iinei. E faapea foi

ona misia e a la uo ua mafanafana mafutaga i Malua nei.

O loo faamoemoe le susuga a Eperone ma le aiga e tuua le Kolisi i le maea ai o galuega o lenei semesa muamua. O le mea moni o le a tele se misia o nei auauna aoga a le Kolisi. Ao le tatolo a le susuga ia Otele ma le Kolisi ia manuia tele le faamoemoe. Ia maua pea le filemu o le Atua e manuia ai le galuega tele o le a auauna ai.

Ae tatou te feiloai pea, a le o iinei i le laumua masalo lava o Aotea-roa.

TAUSAGA MUAMUA

Aoao

1. Brian Kolia
2. Faataualofa Mata'i
3. Fetuliaina Pama
4. Fotuonuupule Perelini
5. Letupu F. Matautia
6. Luteru Ogeuta
7. Mose L. Leiataua
8. Panama Pouono
9. Palau Sinapati
10. Perkins Waterhouse

Faletua

- Tanaria
- Miriama
- Fusi
-
-
-
-
- Herema
- Tausisi
-

Aoao

11. Petaia E. Leavai
12. Sakaio Maiava
13. Sasa Satoa
14. Sasagiinuuese Manase
15. Seumaninoa Puaina
16. Siatafu Tinai
17. Sili Mo'a
18. Tanielu Tuaena
19. Tanoaleia Tunupopo

Faletua

- Magalelei
- Tuaefu
-
- Neda
-
- Logola
-
- Elalaumate

MAFUTAGA A MALUA MA PIULA

Ua tele tausaga ua mavae atu a o lo'o matauina pea le nonofo fealofani ma le fe'oe'oea'i pea o Malua, Piula ma Moamoa e ala i a latou mafutaga fa'aauau pea i tausaga ta'itasi.

Fai mai upu a le fai Salamo "Se mea ina a lelei o uso a e nonofo fa'atasi...". O Malua, Moamoa, ma Piula o le uso e tasi i la le talalelei ma le galuega a le Atua ma o le pogai tonu fo'i lea o le faia pea o ia mafutaga i tausaga uma ona o le fia fa'amausaliina pea o lea talitonuga i le va o Kolisi Fa'afaife'au e tolu.

O le Aso Faraile aso 19 o Mati tausaga nei sa fa'apena ona fa'atinoina ai fo'i lea mafutaga i le aso e tasi ma sa tali malo lava le Kolisi Fa'afaife'au i Malua. E le'i mafai ona auai mai le Kolisi Fa'afaife'au i Moamoa ona o nisi o tuatuaigia le ma'alofia ae na fa'aauauina pea e Malua ma Piula lea mafutaga. Na taunu'u Piula i le 7.30 am i le taeao lea o le Aso Faraile ma fai ai loa ma upu fa'afeiloa'i. Na soso'o le faigalotu i le 8.30 am e moli-moli ai le vi'iga ma le fa'afetai i le Atua ma na ta'ita'ia lea e le Kolisi Fa'afaife'au i Piula. Na mae'a le lotu ona fa'agasolo ane ai lea i le fa'atalatalanoaina o mata'upu e feso'ota'i ma le galuega fa'afaife'au e pei o le aoga o le initaneti (internet), faife'au ma le soifua maloloina, o faife'au ma le aganu'u, ma le tele lava o isi mea. O le itula 11.00 am na fa'ato'a faia ai le malu taeao soso'o atu ai lava ma ta'aloga i le 1.00 pm se'ia pa'ia le 4.00 pm ma o ta'aloga na faia e aofia ai le soka, lakapi pa'i, tosoga maea, tu'uga taga, voli polo, ma isi. Na uma lea ona gasolo lea i api e fa'amalu ai ma sauni ai loa mo le taumafataga o le afiafi i le 5.00 pm soso'o atu ai lava ma fa'afiafiaga a Kolisi e lua i le Fale o Tina. Na matua



Julie Perelini, Otele Perelini (Pule o Malua), Eteuati Tuioti (Pule o Piula), Maselina Tuioti

iloga ona matagofie lea afiafi ona o le matagofie fo'i o fa'afiafiaga na saunia e Kolisi fa'afaife'au uma e lua. Ae na taulugaina mea uma i lea aso ina ua faia le lotu fa'amavae e fa'afo'i ai le vi'iga ma le fa'afetai i le Atua ona o lona fa'atasi mai i fa'amoemoega pei ona sa feagai ai Malua ma Piula.

Na tatala le filiali'i ina ua lulu aao Malua ma Piula ma fa'atofa, ua toe fo'i ai Piula i lona nofoaga i Ano-ama'a ma le mama ua lomi ma le va'a ua goto. Ma o le mea moni na matauina i lea aso o Malua ma Piula o le uso e tasi ia Keriso. O le isi mafutaga e soso'o ai o le a tali malo ai le Kolisi Fa'afaife'au o Piula i lona laumua i le tausaga e 2010. Talosia ia i le alofa ma le agalelei o le Atua ia aulia atu ai i le malosi fou ma se soifua laulelei.

O nisi o vaaiga i le Mafutaga



IA MOTU LE PA AE UA ILOA...

FAIAOGA FAAUUINA MO LE TOFI FAIFEAU SAMOA

O le aofia ai o le Ekalesia Aoao i lana Fonotele o lenei tausaga, na faapea foi ona faauuina ai nisi o lana aufaigaluega galulue e avea ma Faifeau Samoa. O lenei la sauniga faapitoa na faataunuina i le Aso Toonai, 16 Me, 2009 i le Fale Iupeli. O i latou mai le Kolisi i Malua sa faapea ona faauuina o Vaitusi ma Mile Nofoaiga, Semo ma Theresa Tapaleao, Faatafa ma Sinuanua Nefu, Eletise ma Rosa Suluvale. O i latou nei ua atoa le tai lua tausaga o galulue ai i le Kolisi i ana feau ma galuega. la faapaiaina pea e le Atua ana auauna aemaise lenei tulaga ua ausia e o latou soifua valaauina mo ana feau.

ASO FIAFIA



Mafutaga a ulugalii fou ma le Kolisi i lana Aiga Faa-le Aiga Muamua o lenei tausaga

E moni lava o nei aso o aso fiafia aua o le lagona lenei na matua molimauina i aso na tuufaatasia ai nisi o ulugalii fou i le taimi o le tuuaga o le Kerisimasi ma le Tausaga Fou. E tolu faaipoipoga a le Kolisi na faatinoina i lea vaiata. O le susuga a Peniamina Leota (Faiaoga) na tuufaatasia ma Sinatala. O le tamaitai mai le EFKS a Manurewa, Aukilani Niu Sila. Na faataunuina lenei faamoemoe i le Ekalesia i Manurewa e le susuga i le Toeaina Faatonu o Tavita Taulealo. O le susuga Onosai Soo (Faaiuso) na faaipoipo atu ia Toafa, o le tamaitai mai le EFKS a Saasaai. O lo laua faamoemoe na faataunuina i le EFKS i Saasaai ma na faapaiaina e le susuga i le Toeaina o Aliimau Manu. Ao le susuga ia Semikueva Malala (Tausaga Tolu) na osia le la feagaiga ma Florence i le EFKS Sataoa. Na faapaiaina i laua i le sauniga na taitaia e le susuga i le Toeaina Faatonu o Tunumoso Iosia.

O nei aso fiafia na faapea ona auai le toatele o faiaoga, aoao ma faletua. Molimauina le matagofie ma le fiafia o e sa auai. Aemaise lava i ulugalii fou ina ua tau lau o faamoemoe sa faapea ona moomoo iai. la alofagia e le Atua ia maua pea le alofa ma le fiafia aemaise le malosi e faatinoina ai le soifua ofoina mo le Atua ma ana galuega.

PEPA MO LE FONOTELE

O le susuga ia Featunai Liuaana (Sui Pule) ma Eperone Futi o faiaoga ia o le Kolisi na saunia pepa mo le Fonotele i lenei tausaga. O le Malo o le Atua ma le EFKS o le uluatala lea o le tapenaga a Liuaana. O le faamamafa ia faatauaina lo tatou iloa o le avea ai i tatou (EFKS) ma sui auai o le Malo o le Atua.

O le faatauaina o le sootaga o mea taumafa ma le Tusi Paia o le faamamafa lea a le pepa na saunia e Futi. E le gata i taumafa faaletino, ae faapea ai ma taumafai faaleagaga. O le atoaga lea o le ola soifua maloloina o soo se tagata lotu.

AOAO FAAMATUU ESE

E toalua aoao ua tuueseina mai le Kolisi mo se taimi le tumau ona ua la solia tulafono o le soifua aotauina ai i le Kolisi. O i laua ia o Onesemo Nanai ma Howard Leiataua. O aoao Tausaga Fa uma i laua. E lua tausaga ua faasalaina ai ma o le toe faaauuina o le taumafai i le Kolisi o le a toe iloiloia pe a maea le taimi o lo la faasalaga.

SUI MAI LE PTC - IVAN WILLIAMS

O le masina o Aperila na oo mai ai Ivan Williams, o se sui o le Komiti o loo iloiloia le tulaga o loo iai nei le Kolisi Faafaifeau a le Pasefika (Pacific Theological College) i Fiti. O iloiloia lava masani e faia ina ia iloa ai mea e fia faaleleia ma ono suia aua le agai i luma o lea Kolisi. Ua afea le Kolisi i Malua ona o loo toatele ana faiaoga sa aotauina i lea Kolisi Faafaifeau. Sa faatalanoaina poo a ni sao o le PTC e ala i le faatinoina o tiute o faiaoga nei sa iu mai Fiti. Sa faapea foi ona faatalanoa ni auala e ono fesoasoani ai i nisi itu e faaleleia atili ai le auaunaga a le PTC mo le lumanai.

AOAO MAI KIRIBATI MA TOKELAU

O se tasi lava lenei o faailoga matamata tetele o le tulaga faaekumenisi o le Kolisi i Malua e ala i lona taliaina o aoao mai isi Ekalesia ma atunuu e aoaoina i ona laufanua. O lenei foi tausaga ua auai mai ai le sui e toatasi mai le Ekalesia Kerisiano i Kiribati, faapea ai ma le sui mai le Ekalesia Kerisiano Tokelau.

O le susuga i le faifeau o Enoka Reete o loo sueina lona faailoga tikeri o le Bachelor of Divinity i le Mataupu Silisili. O loo malaga mai ma lona faletua o Pelise ma si o la alo teine o Mari.

O le susuga ia Palau Sinapati ma lona faletua ia Tausisi o loo i le vasega Tausaga Muamua.

FAIAOGA FOU MO LE KOLISI



Aigofie, Ella, ma Tilbrook Marino

Ua faafiafiaina foi le Alii Pule ma le aufaigaluega galulue i Malua nei ona ua faaopoopo mai faiaoga e toalua o le mafutaga i lenei tausaga, e ala i le tofiga a le Komiti o Malua.

O le Susuga a Aigofie Marino ma lona faletua o Ella ua i'u mai le lunivesite a Birmingham i Peretania ma le faailoga o le Master of Arts Applied Theology (MAAT) i le Aoaoga faakerisiano (Christian Education). Ua faiaoga Aigofie i le aoaoina o le mataupu o le Aoaoga faakerisiano, Mataupu Silisili (Theology) ma le galuega Faafaifeau (Christian Ministry).

O le Susuga a Visessio Saga na i'u mai le Kolisi Faafaifeau a le Pasefika i Fiti ma le faailoga o le Master of Theology (M.Th Distinction) i le Feagaiga Fou. Ua faiaoga nei Visessio i le aoaoina o le mataupu tau le Feagaiga Fou, o le Mataupu Silisili ma le mataupu o le Talafaasolopito o le Ekalesia.



Visessio Saga

FAALAU TELEINA O LE FALETUSI

Ona ua faatupulaia pea le numera o alo ma fanau a le Ekalesia e aotauina i totonu o le Kolisi Faafaifeau, e le gata i aoao, ae faapea foi i a latou fanau, ae faapea foi le atinae o le potu ma le atamai faatekonolosi, lea ua finagalo ai le Alii Pule ma le aiga faiaoga, ia faateleina le faletusi i le pito i luga. E le gata i lea ae o se atinae foi ina ia siitia ai le auunaga a le faletusi e pei ona iai auunaga faaneionapo i faletusi a lunivesite i



Faiaoga ia Faatafa Nefu ma le auka-muta lava a le Kolisi. E \$150,000 le seleni o le tau faatatau sa fuafuaina mo lea galuega faalautele, e aofia uma ai ma masini komepiuta ma le internet. O seleni lava a le Kolisi sa faaagaga lava mai tupe e maua mai lana faamanuia i faaiuga o tausaga taitasi, lea sa mafai ona faatupeina ai lenei faamoemoe taua. Ia avea lenei galuega ma ala e faalautele ai le potu ma le atamai o



Utua o le sima mo le fasitepu o le faletusi

atunuu i fafo. O le faamoemoe taua ina ia faaaogaina lea nofoaga i soo se taimi mai le 8am-11pm, e fai ai suesuega a aoao ma faletua i a latou meaaoga, ae faapea foi i le

faaaogaina o le internet i soo se taimi e manaomia ai. E 25 komepiuta fou na faatauina mai i le kamupani a le CSL, ua faatotogaina ai lea potu fou, ua mafai ai foi ona faaolaina ai ma le wireless internet. E iai foi le naunautaiga, ia mafai ona faaaogaina lea vaega ua faatele o le faletusi, e le mamalu o le Ekalesia ma le au usufono i taimi o le Fono Tele i soo se taimi e manaomia ai, aemaise lava o le au usufono mai atunuu i fafo i le itu tau fesootaiga i imeli. E iai foi le faamoemoe ua lava ma totoe foi avanoa e teuina ai nisi tusi e mafai ona toe faaopoopo mai mo le faletusi. O le faatinoga lava o le galuega sa feagai ma le susuga i le



Richard, Saipale, Fililagi

alo ma fanau a le Ekalesia, aemaise lava ia mafai ona siitia le tulaga faaleaoaoga, i le faaaogaina o masini ma tekonolosi faaneionapo, e pei ona fesootai ai le lalolagi i lenei vaitau.

TUSI O LE SUEGA ULUFALE 2009

1. Feagaiga Tuai - FAATAOTO
2. Feagaiga Fou - 1 KORINITO
3. Gagana Peretania

FA'ATAUA LE SOIFUA MALOLOINA: Faletua o Faiaoga Easter Tournament 2009



Le Mafutaga o Faletua o Faiaoga ma le latou Easter Sports Tournament - Faatasi ai ma Faamasino o Latu Latai ma Visesio Saga

"FAATAUA LE SOIFUA MALOLOINA"

O le autu lea na agai i ai le Aso Gafua o le Eseta i faletua o faiaoga o loo galulue ai e faatino lea auaunaga mo le alualu i luma o le Polokalamae faamalositino- Tauvela Sua (Taitaifono), Rosa Suluvala (Sui-Taitaifono), Lotu Latai (Teutupe) ma Sina Wulf (Failautusi).

E lua ni au sa vaevaeina i ai ma sa taitaia e le faletua o le Sui Pule, Perise Liuaana ma le faletua ia Salataima Futi, ona o i laua ia o le a tuua le mafutaga ona ua valaauina e nisi o ekalesia e galulue. O faama-

sino o le aso sa feagai lea ma susuga i Faiaoga e talenia tele i le tenisi, o le susuga lea ia Latu Latai ma Visesio Saga. O se aso fiafia tele e le gata i le faletua ia Julie ao matou uma sa auai, aua e fa'i o le manaia o le aso i le laofie a'o le tuanai ai o le Aso Sa o le Toetu i le tele o mea taumafa, ma ua matua manaomia ai lava se faamalositino. E le na'o le tenisi sa faia i lea aso, na mafai ona faia ai ma isi taaloga na malie ai lea aso. O mea taumafa sa agai lava e faataua taumafa mama ma fetau mo le soifua maloloina. Na faaiuina

lea aso i le tufatufaina o faailoga mo au ua lautogia faapea foi meaalofo ma faletua ia Perise ma Salataima o le a tuua le mafutaga, ma le la Eseta mulumuli i totonu o le Kolisi. Manuia galuega o le a alo atu i ai. Sa saunoa foi le faletua ia Julie Perelini e faafetaia lea aso ma na ia saunoa ai i le taua i tina uma ona toaaga e faamalositino aua le ola lelei, ola soifua maloloina, ina ia manuia aiga, manuia foi tiute ma faiva na tofia i ai e le Atua.

Faafetai

Tauvela Sua (Sui o le Komiti)

MAOTA FOU-PULEGA SINI I MATU

O le fausiaina o se maota fou o se tasi lea o tapenaga ua vaaia so'o i nei ona aso i vaitaimi o usugafono a le ekalesia EFKS i Malua. E tai le misi lava se tausaga ma se umusaga o se fale fou o se pulega a o le'i usuia fonotaga a le ekalesia e pei ona masani ai i tausaga uma. I le tausaga leni 2009 na umusaina ai le maota fou o le Pulega a Sini i Matu mai le matagaluega a Niusaelese i Ausetalia. Ma o le susuga i le toea'ina ia Rev. Peleti

To'ailoa ma le failautusi o le pulega ia Rev. Isa'ako Patea o i la'ua ia na gafa lava ma le gasologa o leni galuega.

O leni galuega na amataina i le aso 12 Ianuari 2009 a e na fa'ato'a mae'a i le aso 31 o Mati i le tausaga nei lava. O se tinoitupe na fa'aaluina i le fausiaina o le fale e tusa ma le \$270,000.91, ese mai ai ma le tau o le aufaigaluega kamuta (labour) e \$80,000.00 tala. O nei tupe e tele pei ona fa'aaluina i le

galuega sa tagi lava i lima o leni pulega i susuga i fa'afeagaiga ma le nofo a ekalesia e ala i a latou sa'ili-ga-tupe. O le auga lava ma le fa'amoemoe o le toe fausiaina o le fale o le pulega ina ia lelei ma matagofie le maota e api ai le au usufono i taimi o usugafono a le Ekalesia Aoao.

O le aso 9 Me 2009 na fa'a-

fa'aauau itulau 13

mai itulau 12

pa'iaina ai le maota fou o Sini i Matu. Na muamua le viiga ma le fa'afetai i le Atua ona o le galuega matagofie ua molimauina ae na mulia'i ai i fa'aaloaloga o lea aso. O le susuga i le Ali'i Pule o le Kolisi Fa'afaife'au i Malua le susuga a Otele Perelini na ta'ita'ia le sauniga o le fa'apa'iaina o le fale. O le mae'a ai o le sauniga na soso'o ai loa ma le fa'atinoina o fa'aaloaloga aua lava le mamalu o le au vala'aulia na tala aao ma afio mai.

O le pulega a Sini i Matu e fitu ona ekalesia ma o lo'o toea'ina ai le susuga i le Toea'ina Fa'atonu ia Peleti To'ailoa. Ia saga fa'atutumuina pea e le Atua mea ua to'esea ma ia saga vi'ia ma fa'amanuina pea le suafa mamalu o le Atua ona o mea silisili ua o tatou faia mo la ma lona finagalo.



Maota fou - Pulega Sini i Matu

MAFUTAGA AOAO

I le amataga o lenei tausaga faaleaoga , ua faamaonia le numera o aoao: Tausaga muamua 19 , Tausaga lua 24 , Tausaga tolu 26 , Tausaga fa 24 . E tasi le sikolasipi mai Toelau (Tausaga muamua) faapea le silokasipi "Kiribati" (B.D programme) ona maua ai lea o le ao-faiga atoa o aoao e 94. E toafa sui o le (B.D programme) o loo tausavali pea latou.

O se amataga faigata i le tape-naina o le aai ona o le tetele o le vao mai timuga o le vaituuuga umi. Peitai o le tele o moa vao fou ma le galulue fiafia o Aoao ua faigofie ai ma vave galuega o le vaiaso uamea.

Na vave ona faagasolo galuega masani a le nuu ina ua tofia galuega faapitoa seia oo lava i kuka tu-

mau. O nisi o nei galuega e aofia ai, fagaina o laumei, togalaau, canteen, faieletise, palama, pa povi, fai computers, Junior Youth, Au Asafo, Sa Levi faapea Faiaoga Aso Sa.

O lenei kuata sa feagai le mafutaga ma tapenaga o le uluai faauuga a le Bible School, faapea le Soo ma Piula ia Mati. O nisi o galuega o loo faaaauu pea e iai le fale taalo, faapea le atiga o le pa i le auala, ua aafia i le mago ma ona aa ua faaleagaina ai.

O le galuega tele foi a aoao ma le au ili laau le faamamaina ma le tuuina i lalo o laau, o mago, tamaligi, ulu, sasalapa ma le vi tele, i le nofoaga ua fausia ai nei le Mission House i tua ane o le Fale lupeli.

O nei galuega uma sa vaaia ai le

galulue fiafia ma le feoeoeai o le au uso , ma te molimau atu e lei faigofie nei galuega uma , a ua faaalua ai le alofa ma le puipuiga malu a lo tatou Atua e ala i le tapuaiga ma talosaga a le Ekalesia i aso fai soo. O ni faamalositino aoga, ao ni aoaoga taua foi o le ola aotauina.

Avea ia lenei avanoa lelei e faaleo ai se faafetai tele i Tama o le Ekalesia, le au faigaluega a le Atua ma le nofo a aulotu ona o la outou tapuaiga ma talosaga ua sologa manuia ai lo matou alo faiva i aoaoga ma feau i le laumua nei.

Manuia tele taualumaga o le Fono Tele o lenei foi tausaga i le alofa o le Atua.

Falefa Leaula ma Fuifui Teevale (Laulau a le Kolisi)

VAEGA A LE PA POVI

O le tasi lenei o atinae a le Kolisi o loo galulue ai susuga i aoao e toa 8 i lalo o le taitaiga a le susuga i le faiaoga o Vaitusi Nofoaiga. Na amata galuega faatino o lenei tausaga i le toe faafouina o le sikotia (stockyard), ona ua faaletonu pou sa iai muamua. O le mea moni, e le o se galuega faigofie, aua e fai o le tuu i lalo o niu, fisi pau, ae toe faatulaga lelei foi pou ina ia malosi le pa. A fua foi i lona faatinoina, e nao le Aso Gafua ma le Aso Lua i le afiafi pe a tuua le aoga, faapea ma le Aso Toonai. Peitai, e ui lava i nei faafitauli ma faigata, ae sa loto tetele pea susuga i aoao, na afua ai ona maea lenei galuega i totonu o le 4 vaiaso. E faafetaia ai le susuga i le faiaoga ona o lana fautua ma lana

faamalosiau, na maua ai le loto tetele e susuga i aoao e faatino ai le galuega, o lea ua maea ma ua tau lau o le faamoemoe, faafai laia le viiga ma le faamanu i le Atua, aua o la e ona le malosi uma lava.

E maea le galuega i le tausaga na tuana'i atu nei, toe 26 manu papalagi, ona ua fautuaina e le susuga i le Pule o le Kolisi, ina ia faaitiitia le numera i le 30 ona o le tulaga faaletonu i le vao. O le taimi nei, o lea ua oo atu le numera i le 28. E lua manu fananau i le amataga o lenei tausaga. O loo galulue pea susuga i aoao i le vaaia lelei o le pa, ma tauti lelei le lafumanu a le Kolisi, aua o le tasi lea o atinae o loo maua ai ana tupe. E ave ai lenei avanoa e momoli ai le agaga faafetai i le su-

suga i le Pule, faapea susuga i faiaoga ma le Kolisi, ona o la outou lagolagosua, aua le faaleleia o lenei atinae. Faafetai tele i le susuga i le faiaoga ia Vaitusi Nofoaiga ona o timaiga ma fautuaga taua, ua mafai ai ona faatino galuega o lenei kuata. E momoli foi le faafetai i susuga i aoao, ona o le lē faalogologo tiga, ae tauivi ma finau pea, ua ae malo ai faiva o lenei kuata. O lea ua maea galuega o lenei kuata, tatou ave le viiga ma le faamanu i le Atua. Malo lava le taupati!!!!

Faafetai Lava
Vaituu Palale

MAFUTAGA A FALETUA

O se tala otooto lenei mai le mafutaga a faletua o aoao o le Kolisi. O lenei mafutaga e i lalo lava i le vaaiga ma le pulega a le faletua o le Alii Pule, le faletua ia Julie Perelini, peitai o le avea ai o i maua o le peresetene ma le failautusi o le mafutaga, o le a faamatalaina ai ni matafaioi o loo gafa ma faletua i aso faisoo.

E lima sefulu ma le valu le aofai o faletua o loo aotauina nei i le Kolisi. (tausaga muamua e 10, tausaga lua e 15, tausaga tolu e 16 ma le tausaga fa e 17).

O galuega ua vaevaeina ai faletua i vaega laiti (groups) se ono e pei, o le Home Group – e feagai faletua mo le vaaia o le maota o le alii pule ma le potu o faiaoga. O le falesa e i lalo lava i le taitaiga a faletua o faiaoga, ma o loo galulue faatasi ai nei le faletua ia Lalokava Lima, Theresa Tapaleao, Sina Wulf ma faletua o aoao, aua le tapenaina o le malumalu o le Atua i le faaleleiina o totonu ma fafo aua sauniga lotu i Aso Sa ma aoga lauga (sermon class) i Aso Tofi. O le vaega i le fale mafutaga e feagai lava i le teuteuina ma faamama mo sauniga lotu i taeao, mo aoga, ma isi fuafuaga uma a le Kolisi e faaogaina ai le fale mafutaga faatasi ai ma le fale Senetenari.

O le Aoga Faataitai (kindergarten) o loo taitaiina lava e le faletua ia Julie Perelini, faatasi ma le fesoasoani a faletua. E faia nei aoga i aso e lima mai le iva i le taeao seia oo atu i le sefululua. O le fale ai (dining room) mo aoao nofotoatasi o galulue ai le vaega o faletua e iva faatasi ai ma le faletua ia Lile Niulesa. O le faletusi o le galuega tumau lea a nisi o faletua o le faamamaina foi o totonu ma fafo faatasi ai ma le fesoasoani i le susuga i le Sui Pule ma le faletua, faapea ma faletua o faiaoga o loo iai nei, le faletua ia Mile Nofoaiga ma

Sinuanua Nefu.

O lotu a tina o le tasi lea vaega taua o le aotauina ai o faletua o le Kolisi, e faatino ia sauniga i po o Aso Tofi. O nei sauniga lotu e faatinoina lava e faletua o le pule o faiaoga ma faletua o aoao faaiuso.

Ua le toe faia nei ni aoaoga i mea taulima, suisui ma kuka, ona ua ave le faamuamua i le aoga faa-le-Tusi Paia (Bible School) a le Kolisi. O se tasi lenei o vaega taua ona ua vaaia ma faalogoina pea le tele o le silafia o faletua taitasi uma ua maua mai lenei polokalame. O lenei la polokalame e filifili lava e le faletua mataupu e lua pe tolu mo le semester. O taimi o vasega e faia lea mai le iva i le taeao, seia oo i le iva i le afiafi, e fuafua nei taimi i le taiala (timetable) ua saunia lava e faiaoga.

O taaloga ua faamalosia pea e le susuga a le Alii Pule ina ia maua ai pea le malosi o le tino ma le mafaufau, ma ua faatino lea polokalame taalo i Aso Tofi o vaiaso uma. O loo maopoopo foi lenei vaega o le mafutaga ona o le lagolago sua mai o faletua o faiaoga, i le susuga ia Tauvela Sua ma Salataima Futi, faatasi ai ma faletua o aoao faaiuso.

O nisi tiute tauave a faletua o le auai lea i faamuli e faia i taimi o le fono aoao a le Ekalesia, o faamuli i faaiuga o kuata, aemaise o le galulue ai i totonu o auaiga o faiaoga. O nei vaega uma e pei ona taua i luga ua tele se aoga mo faletua uma aua le sauni atu mo galuega faatalitali mai ma le faaogaina ai lava o matou tagata mo le Atua ma lona finagalo.

Soifua,
Tualupetu Falefaosamauga Leauma (Peresetene)
Roberta Fuifui Teevale (Failautusi)

MALUA KINDY-KUATA 1



O faiaoga o le Malua Kindy

O le aso 17 Fepuari na toe amataina ai galuega a le Aoga Faataitai mo le Kuata muamua 2009. E toaluasefulu ma le tasi le aofa'i o tamaiti na faaaluina mai i le amataga o le Kuata, ma le isi toatolu na faaulufale mulimuli mai ina ua atoa le ta'i 3 tausaga. E toatasi ua atoa lona 5 tausaga, ma ua ulufale atu o ia i le aoga tulaga lua, ma o le aofai o le aoga se'ia oo ina mae'a le kuata muamua i le aso 1 o Me, e 23: e toa iva teine ae sefulu fa tama. E amata le aoga mai i le 9 i le taeao se'ia oo i le 12 i le aoauli mai i le Aso Gafua i le Aso Faraile. E toafa faletua ua o latou maua tusi pasi (Certificate in Early Childhood Education) mai le USP, Alafua, o Latitu-

te Sasagi, Vaisaili Palale, Vaaufiao Lelevaga ma Milly Tuiloma Pita.

O faletua sa gafa ma le ao'aoina o le fanau i lenei kuata: Sapie Amosa, Winona Faasavalu, Toafa Soo, Lipale Tanoi, Suia Toleafoa, Makerita Kamuta, Faataualofa Meaalofa, Miriama Matai, Florence Malala, Taalefili Tanaria Kolila.

O Aso Toonai uma lava i le itula e 7 i le taeao e faia ai a'oa'oga faamasani (workshop) ma le faletua ia Julie Perelini aua le saunia o lesone ma galuega (activity) o lea vaiaso ma lea vaiaso. O loo i ai foi taiala ua saunia e agai i ai a'oa'oga o aso taitasi. O pese, siva, tauloto ma taaloga o isi ia o vaega o loo aofia i polokalame i aso taitasi, e ese mai i latou galuega faatino (activities). O loo faapea foi ona lagolagoina e le pule ma le Aoga Faataitai i Malua polokalame a le faalapotopotoga o le "Fono Aoao Aoga Amata i Samoa" (National Council of Early Childhood Education for Samoa - NCECE) i lalo o le faamalumaluga a le Matagaluega o Aoga, Taaloga ma Aganuu a le Malo. O le aso 3 o Mati na oo mai ai la latou asiasiga i le Aoga Faataitai a Malua ma na latou moli-mauina ai le mautu o alaga'oa (resources) aemaise o nofoaga e faaogaina ma taaalo ai tamaiti i totonu faapea ma fafo.



Ou te avea ai lenei avanoa e momoli atu ai le agaga faafetai tele i le faaaluuluga o le Aoga Faataitai a Malua, le faletua ia Julie Perelini mo ona tomiai eseese sa faasoa mai mo i matou a'o feagai ai ma le a'oa'oina o alo ma fanau a Malua i lenei Kuata. E le faagaloina foi le agaga faafetai i le susuga a le Alii Pule - Professor Otele Perelini faapea susuga i faiaoga ma faletua aemaise o le mafutaga a aoao ma faletua i le lagolago sua i polokalame fai aua le agai i luma o le aoga faataitai a Malua. E le faaitiitia foi le agaga faafetai tele i faletua o le vaega a le Kindy i lenei Kuata. Faafetai tele mo galuega lelei ma le mae'ae'a sa outou faatinoina i totonu o le tatou vaega, ma ia faia ia mea uma ma viiga o le Tama o i le lagi. Ia manuia lava le aga'i atu i le fono aemaise le tuuaga. (Milly T Pita)

AUTALAVOU LAITI

E muamua lava ona sii le viiga ma le faafetai i le Atua ona o lona alofa ma lona agalelei, o lea ua mafai ona faaiuina lenei kuata faaleaoaoga i le manuia. Ae e le gata i lea ua mafai ai ona faataunuaina polokalame a le Autalavou Laiti (Junior Youth) i le manuia. Ae o se ripoti puupuu lenei i le galuega a le Autalavou Laiti sa feagai ai foi mo lenei vaituuaga.

O le autalavou laiti, o se polokalame mo le tupulaga talavou, o i latou ia e amata atu i le 13 tausaga ma agai atu i luga. O lenei polokalame o loo i lalo uma i le faaululuga a le Alii Pule Rev. Professor Otele Perelini. E toa 4 ni sui mai i le aiga faiaoga o loo lagolagosua i lenei polokalame. Ma o i latou nei, o le susuga ia Terry Pouono, Aigofie Marino, ma faletua ia Lemau Palaamo ma Toese Pouono. Faatasi ai ma le fesoasoani a alii aoao ma faletua e toa 8 e pei o le susuga ia Isaako Sefo, Risati Noaese, Apineru Faasavalu, Lole Fiso, Faafetai Aiava. O faletua, o le susuga i faletua ia Pauline Upu, Fofoga Setefano, ma Cynthia Faletagaloa.

O le aofaiga o tama ma teine o le Autalavou Laiti e 20, e 10 tama

10 teine e aofia ai alo ma fanau o faiaoga faapea ma aoao. E tele lava nisi o polokalame sa faatinoina e le Autalavou Laiti i lenei vaituuaga. E pei o aoga Tusi Paia (Bible Studies), o finauga e faaoga ai le mafaufau ma le poto salalau (Debates and general knowledge). Sa talanoaina foi ni mataupu e ono aafia ai le tupulaga talavou, e pei o le tagofia o le ava malosi, o fualaau faasaina, ae e le gata foi i lea o le faailoaina o a latou aia tatau, ma le anoanoai o nisi mataupu sa talanoaina. Ma o nei polokalame e faatinoina i afiafi o Aso Toonai mai le 7pm i le 9pm. O le faamoemoe lava o nei fetufaaiga i afiafi o Aso Toonai, ina ia maua e le fanau ni mafaufauga lelei ae e le gata i lea o le faamausaliina o le ola faatuatua o le fanau e ala i le Afioga Paia a le Atua. Ma ia mafai ona ola tapena le talavou i nisi foi o faafitauli faapea faaososoga e ono osofaia ai i latou i lenei vaitaimi o le soifuaga. E aoga foi le faasoa mai o le fanau e iloa ai foi e taitai nisi o mea fou e ao ona latou silafia e uiga i lagona o le tupulaga talavou. O le itula e 3 i le aoauli o Aso Toonai taitasi e faatinoina ai taaloga a le fanau, e pei o le soccer, touch rug-

by, volley ball, lape ma nisi mau taaloga eseese e mafai ona faatinoina. Ae e le gata foi i lea o loo faaauiaina foi nisi o polokalame masani e pei o le Aso Maliu, na faatinoina ai e le fanau le tala mo le Eseta i le Aso Lua ao lumanai le Eseta. O se tala foi na faamanatu mai ai tiga ma puapuaga na oo i lo tatou Alii Faaola, na oo lava i le sa-tauro ma toe soifua manumalo mai i le tuugamau i le aso tolu. Na faaiuina le mafutaga a le Autalavou Laiti i le faatinoina o se activity o loo faaigoaina o le "Taua o le Tatalo i Tapuaiga" ma sa faapea ona aoaina ia le fanau i le auala e tusiaina ai talosaga.

O se ripoti puupuu lena i galuega sa feagai ai ma le Autalavou Laiti i lenei kuata. O le naunautaiga lava o faiaoga faapea taitai, ia maua e alo ma fanau a Malua ni taiala lelei aua lo latou ola tuputupuae, ma ia faavae i le Atua soo se laasaga o o latou olaga.

Ia manuia fonotaga a le tatou Ekalesia o loo feagai ai, ma ia faia pea ma viiga o le Atua, soo se galuega lelei tatou te faia.

Faafetai tele
Risati Noaese

TAALOGA A AOAO

E viia pea lo tatou Tapaau i le lagi ona o lana tausiga ma lana leoleoga i lo outou soifua ma so matou ola, ua mafai ai ona tatou aulia mai ma le manuia le faaiuga o lenei kuata faa-le-aoaoga. Ae o sina ripoti lenei i tulaga na oo iai le polokalame taalo a le mafutaga a Aoao i lenei foi kuata.

E lua malae o loo faaaogaina mo taaloga. O le malae numera tasi i lumafale, mo taaloga soka ma lakapi pai (touch). Ua vaevaeina foi le mafutaga i au se lua, o le "Black" ma le "White".

O taaloga Kirikiti i le malae numera 2 i tuafale, ma ua vaevaeina foi le mafutaga i au se fa, o le Blue, Green, Red ma le Yellow. Ua iai foi le komiti faafoe o lenei tausaga. O le taitai o le Susuga i le Faifeau Faiaoga faatasi ai ma sui taitoatolu o au e lua:

Taitai: Faifeau Faiaoga Susuga Maafala.Lima.

Black: Alo Pita, Masitone Sasagi, Martin Mariota.

White: Asora Faresa, Siaosi Mataia, Anitoni Misa.

Luga o Taaloga:

Maeu le finau o au e lua i taaloga o le soka ma le lakapi pai. Peitai ua matauina i le 6 vaiaso na faatino ai taaloga, le malosi tele o White i lenei kuata. E oo foi i le lakapi pue, e pei ona iloilo ai au e lua, na moli-mauina ai le alualu i luma o le finau a White. Peitai, e leo faatamala ai foi le finau a Black, aua e iloa lava i le tuufaatasiga o ai o taaloga i Aso Tofi taitasi. O le aotelega la o taaloga i lenei foi kuata o loo tulai mai ai o loo sili points o White. Ma e iai le faamoemoe o le a avea le tuuga e toe koleni malosi ai au e lua mo le isi feiloaiga i luga o le malae i le kuata lua.

I le taamilosaga o le Kirikiti o loo faaaui pea ona umia e le au malosi a le Blue le talita. Na

matuina le finau tele o au i le sailiga o le au e taaalo i le talita, ma o le taunuuga o lea finauga tele, na sue ai loa Blue ma Green. I le iuga o lea taaloga, na manumalo ai Blue, ma ua umia ai nei e le Blue le talita i lenei foi kuata.

Mafutaga Taalo a Malua ma Piula:

O le Aso Tofi 19 Mati 2009, na faataunuaina ai le soo a Kolisi Faafaifeau e lua i le laumua i Malua. Ma na faia ai foi ma le polokalame taalo i lea aso. Sa vaevaeina Kolisi e lua i au e tolu, o le Blue, White ma le Red. Sa faia le taamilosaga volleyball a faletua, ao le soka ma le lakapi pai a Aoao. Na maua le taimi e tuufaatasai ai i le afiafi Faletua ma Aoao, ma faia ai loa taaloga afeleti; moliga fua, tuuga taga ma tosoga maea. Na molimauina e Susuga i Alii Pule o kolisi e lua, o Susuga i Faiaoga ma

fa'aauau itulau 16

